

جُوَّایکا سِرِّ نشر

محمد عبد المنعم الحناطي



سلسلة شهرية تعنى بنشر إبداعات الشباب

• هيئة التحرير • رئيس التحرير

مديرالتحرير السعيد المصرى سكرتيرالتحرير

يبثم الحياج عبلي

يونس شعبان

ملعلة كثانة

تصلرها الهيئة العامة لقصور الثقافة

رئيس مجلس الإدارة سعد عبد الرحمن أمين عام النشر محمد أبوالجد مدير عام النشر البتهال العسلي الإشراف الفني

ه جُواياسر

ه محمل عيك المُتعم الحناطئ الهيئة العامة لقصور الثقافة القاهرة 2013م 19,5× 19,9 سم متصميم الغلاف أحمد الجنايتي

ه تصنيح العربية الحمد الجدايدي و تدافيق الغوى: ياسر المحمدي و رقم الإيداع: ٢٠٠٧/ ٢٠٠٣ و الترفيم الدولي: 336-337-778-978 و المراسلات:

ياسم / مدير التحرير على العدوان التالى، 16 أشارع أمين سسامى - قسمسر السمسيستى القاهرة - وقع بريدى 1856 ت. 2794780 (داخلى، 180)

الطباعة والتنفيذ،
 شركة الأمل للطباعة والنشر
 ت، 23904096

الأراء الواردة في هذا الكتّاب لا تعبر بالضرورة عن توجه الهيئة بل تعبر عن رأى وتوجه المؤلف في المقام الأول.

ه حقوق النشر والطباعة محفوظة للهيئة العامة لقصور الثقافة. ه يحظر إعادة النشر أو النسخ أو الاقتباس بأية صورة إلا بلان كتابى من الهيئة العامة لقصور الثقافة، أو بالإشارة إلى للمسدر.



ال هـداء

أَنَا شُوفْتَهَا.. مَاشْيَهُ عَلَى المَيَّهُ.. بِتَغْسَلْ جِسْمَهَا الْمرمَرْ.. بِضَى الشَّهْد، قُلْتَ لُهَا : مَدَدُ مَدُتْ إِيدِيهَا اللّولِي.. تِمْسَحُ مِنْ عَلَى مَلامْحِي الْهُمُومْ. تَتَجَلَّى عَ الأَرضْ الْخَرَابْ تَغْسَلْهَا بِنشْيد الصَّفَا.. نَدَهِتْنِي.. آخُدْ مِنْ شَفَايِفْها.. العُهُودُ .. نَرْجِسْتْ قَلْبِي واستَحَمِّيتُ بِالنَّدِي واستَحَمِّيتُ بِالْنَدِي النِسْوَهُ .. قَفَلَتْ صَرْفِتِينْ عِينِي الرَيحْ فَتَحُهم لِي الرَيحْ فَتَحُهم لِي الرَيحْ فَتَحُهم لِي .. عَنْي.. وسَابتْ (سرِّهَا).. فيًا..!

محمل

نبوءة

عِينْ غَريبه عَ المِيدَانْ عمَّاله تقرا في الشَّوَارِعْ والجراح متنوره دَاخِلْ زِحَامُ الكَفْ: عيَّل.. وضاعت .. من سَمَاوَاتُه اللَّعَبْ متعَلقَهُ رُوحُه فْ حَوَادِيتُ الشَّتَا مَسْتَقْصَدَاهُ التَّوهَهُ

كَارْهَاهُ الشَّوَارِعْ صُوتْ الفَرَامِلْ.. طَمَّنُهُ.

عُدا الإشارِهُ يندهسْ مُخُه. يفُوقْ.. يِكْبَرْ.. يضيقْ الكُّونْ عَلِيهْ.. فَيْسَاعْ هُمُومْ الْحَيْرَاتِينْ جُواًهْ [

وصيتة اولى

مَا تُغَنيلوشْ.. عَلَشَانْ بِنَامْ. وَلا تَدَبَيكوشْ جُوَّاهْ.. تَراتيلْ الْحَمَامْ الْوَرَى عَليهْ.. صَفْحَهُ فْ كَتَابْ الهَّمْ مَا تُغَطيهُ وشْ مِ البردُ مَا تُغَطيهُ وشْ مِ البردُ عَلَشَانُ الدَّفَا جُوَّاهُ عَلَشَانُ الدَّفَا جُوَّاهُ فَيُومْ عَيْدُ البَّرْدَانِيْنَ الدَّفَا جُوَّاهُ فَيُومْ عَلَيْ البَرْدَانِيْنَ الدَّفَا جُوَّاهُ فَيُومْ عَلَيْ البَرْدَانِيْنَ الدَّفَا جُوَّاهُ فَيُومْ عَلَى كُلِّ البَرْدَانِيْنَ الدَّفَا خَوَّاهُ فَيْ يَومُ

مناديل

زَى مَا يْكُونْ مِشْ شَايِفْنِى مَنَادِيلْ يَا بِيهْ ؟ ا عِدَّى الإِشَارَةُ . . زِى مَا يْكُونْ مِشْ شَايِفْنِى ، لَكَنَهُ مَا دَاسْنِيشْ مَعَ إِنِّى نِفْسى فِ كُلِّ مَرَّه يَحْتْ عَجَلاتْ الحياه يمكن أعيشْ ا

صِراحُهُ بِينْبِشُ في اللكوتَ

بُصُ لعدادُ العمر وهو بينزف موت كانت أوراق فى شجرته بتفرفت.. ع الأرض الجاحده من غير صوت بيموت؟! ونتيجة حاصل عمره مافيش هيعيش؟! لكن على إيه هيعيش؟! اتألم قام ابتسم الألم الساكن فيه أنا ليه ؟

اتمرمط في بارات الدنيا وسكر من طينها كاسات وكاسات واتشعلق في حبالها الدايبه ووقع ع الأرض وداست فوقه الشقلبظات ولأنه اتعود جلد الذات واحمرت.. على روحه العلامات اتزق بروحه في مظاهرات

من أحلامه بنات هربت وفاتوه وصحاب ماتوا وسابوه.. عايش عاشوا وسابوه . . بيموت أوراق في شجرته بتفرفت ع الأرض الجاحده من غير صوت بص لعداد العمر وهو بينزف موت وصراخه بينبش في الملكوت!

لعبة

مدیتی الإید بإیشارب حریر غمضتی عینیا ورحتی بعید عدیت للمیه وما ظهرتیش وسالت الشمس فی سطح البیت وبعزمی نادیت لقیت العمر بطوله علیکی وما لقیتکیش وما لقیتکیش وترهی منی وما تلاقینیش کان فیها إیه لو کنا لعبنا عریس وعروسه وکنتی دخلتی لروحی ف بوسه وما طلعتیش.

المتدوهة

لبنت مش شبه البنات.. غير في انتصار الخوف على روحها الهزيله.. تنتشى بالمعجزات لم الخط الحلم فوق المكياجات وتلون الأحزان بلون الروج وكأنها بتتخفى فيها.. في لحظة الحريه لما ترتعش ع البحر شمس البردانين

حافظاها كل حوارى سيدنا الحسين، والسيده..

شايله الصينيه فوق دماغها ممده ورايحه بيها لرحمة القرابين ما عرفتهاش علم اليقين لكنها عارفاني من قبل القصيده وعارفه اني..

· بانكمش جوايا..

زى قميص

بيتكرمش على حبل الحنين

بتترجم..

المواويل على محطة ترام عربى يونانى وباللاتين وبتبنى فوق الرمل حريه لكل القلقانين متمرمطه من بار له بار و الفرش لها السجاده نار وتصلى زى السكرانين السجد.. وتوصل للمدى في ركعتين من فين لـ فين وراها تجرى كتايب التايبين وأنا كنت فين.. ون قبل ما يلمسنى ديل فستان لبنوته بتحلم..

مندوهه للحلم المشاغب من زمان الانكسار

فتحت لى شنطتها عشان أبكى حنين وتلم فى جيوبها الدموع وتيسبنى على شطى وحيد مع لعنة الحلم اللى مصلوب

فوق شريط القطر

والشنط حجم اتساع الحضن للخايفين

مع بكره اللي جاي.

یا مسافر وحدی

یا للی مسافر وحدی أنا وفایت لکم روحی تنحت فی جدران القلوب دقات سایب لکم وردتی دبلانه فی حضن الکتاب من غیر دموع البنت ترویها متفرفته حکایات تبکی فیتخنق السکات من سجن ماضى لسه ما ماتشى وإن كان مات وإن كان مات سايب علاماته على روحى وفى الشهقات هل يا ترى فاكرين ؟ لسعة جتتى فى البرد، لسعة جتتى فى البرد، وحيد فى الليل وحيد فى الليل ونصايح الأستاذ كما سنّاد يشد العود مين اللى خلا الرنه فى روح الوجود رعشة وترع العود بعصحى على اسمى أنا مش أنا

على اسم ناس عاشت بلا عنوان

"ودعني . ، من غير ما تسلم" ده انا في الحاجات دى جبان ولا تسيب القصيده تئن في سرك فتنطفى الألحان يا مسافر وحدى وفايتكم رافضين تفوتوني . . وانا رايح لأي مكان من شنطتی . . بتفوح روايحكم تنطق.. ملامحكم في صورتي وتلمعوا كالدمعه.. في ختم المغادره ع الجواز سايب لكم نفس البيوت مكروش زحمة قلقع الطابونه..

وأنا اللي باحوش وزعيق عيال الحاره .والنور من عنيها راح وبكا الصبايا . . والقمر مخنوق حب العزيز . .

والبوظه للي يدوق

وخنافة ع القهوه

وعربدة صايع بيرسم ع البيوت اقفال لا ميت قصيدة نثر تشفيني ولا شعر تفعيله
ولا واو ولا موال
كل اللى قلناه وقالوه من قديم وأنا ليه
لسه باحس الشعر لم ينقال
لا أنا كنت حرف اصطفانى للوجع قواًل
ولا كنت شاعر نبى وبرىء من اللى انقال
أنا اللى كنت بازك فى هم القصايد مثلما
عابر سبيل المنتهى رحًال
وأنا اللى نفسى أطول ف يوم سرى
والشعر سر الروح إذا ينطال
وانا بحت بالسر..

نعشى هيرجع لكم منقوش عليه فلري لا بر مصر اشتكى من لفي ع الفاضى ولا كنت أنا خفيت من لعنة الشاوير ليه المغنى في البروفه شد عن ألمة مناس واتغرقت أوتاره بدموعي وتناه نغمه ويا عزيز عيني اتعمت م الحزن ما رحموا لا أنا اللي طيب ولا الموصوم. .

إذا وصموا ولا أنا أبو الطيب أجاوبهم.. إذا اتهموا

الموت جوازي والألم سفري

(إذا ترحُلت عن قوم وقد قدروا.... ألا تفارقهم فالراحلون هموا) لا كنت ده ولا ده وان تهت فى العنوان هيفنى "عبد الوهاب" وهتصرخ الأخان "ودعنى من غير ما تسلم" ده أنا فى الحاجات دى جبان انا اللى فى وسطكم من غير ألم عريان حتى وأنا ف عز الفرح زعلان.

ورا القضيان

وحصنك قوى وغفيتى قام سابك عاصيه على احبابك خاضعه لحجابك طب راضيه ليه بهوان نفشت على جدار سجنها حره .. صرخ جدار السجن في السجان .. في ناس كتير متقيدين بره ..

حلمك

الزفة

كأنها حالة ميلاد للخوف و تفرض عليك حرب انتصار للذات زى انكسار النور في كوباية وزغللة ألوانه في المرايات أنا قلبي واقع من على شلال مسحوب بفعل الجذب للأنات انفخ في دخان السيجار م الخوف جروحي تعمل في الفراغ نايات والعزف يملاني ألم وأشوف النخل واقف يكسر النوات أما البشر محنى بذل وخوف يتمرجحوا مع رنة العملات

الطير مسافر سرب ساحب سرب وأنا لسه طاير في الفضا بثبات وافض أكون في زفة كدب ف كدب الطبله تعوى وأنا أمسك الصاجات في إيدى باسبور للهروب باعني وقلبي شارياه البيوت والناس لا هموت غريق في غربة تبلعني ولا هاقبل إني في زفتك أنداس.

المخرج هينادى اللبلاب

الشجره بتاعتى طرحت ورد وماحدش جانى وقال ورده الناس سكرانه بأحزانها عايشينها ازاى والروح بارده أشجارهم مهزوزه من الريح الكل بيدارى ف خوفه وسينوف حلمه مع المجاريح قال أكشن فالبنت الورده الدبلانه فالبنت الورده الدبلانه ونداها يغرق فى الصوره ما لقتش دموع

واقف غلبان
مجروح موجوع
ودموعة تنظ من البرواز
الخرج مارضاش يديله..
دور السكران
مع إنه سكران من همه
والهم طرح لجيوبه لسان
والبنت النجمه المشهوره
لبست في مايوه وف حضن بلاج
خبت في دموعها الحسوره
من خوفها لا العمر يعدى
والحلم يقصوه في المونتاج
بصيت في عيون صاحبي الخرج

بصيت لمثل دور تاني

مش باصص غير لنهايه اليوم وهيعمل كام أوردر تصوير وهيعمل كام أوردر تصوير والخرج... مش محتاج لورود عشاعى علشان الانتاج هيجيب له الورد صناعى والورد اللى انا فاكره بتاعى دا يدوب أديه للبنوته فتعيط طول الليل من الخوف من الخوف

فلاقيتها إزاز

ما تقولش ظروف علشان الورد أما هيدبل ويموت معسور انخرج هينادى اللبلاب يديه الدور.

لونها الخطوف

طعم الخط الأحمر مالح

ما سمعش عنى البحر . . يا صدف الرمال الأنه مستقيل م المرج . . من أحضان الجبال مربوط ف سقف الدنيا . . مشدود للسراب ، والليل حبال ! وازاى هيسمع عن ولد شارب أسى الصمت / اللهيب والموت بيسرى فيه دبيب . . .

ايأس ودورع النهايه الصمت، الصمت، لون الحيره ويًا العجز، لون الضعف ف عيون البنات مش بس ليك متشابهات دول صوره للخوف... اللى محقون ف الضلوع اللى ماعات بيبان... ف ضحكه ميته أو...

وهو مايعرفوش؟! سك البيبان..

ف حضن كتاب قديم! انفض غبار الذكريات اكشف عن التاريخ غطاه! حيفور على الأرض.. اللي مسقيّة عطش الليل بُطُشُ! ليه لسه مستنى ف شفايف . . معقودين بالصمت؟! شبابيك حبيبتك.. انسرق منها القمر دمك جليد. خر الألم لطخ مواويل السهر حتى الشجر.. لون الخضار فيه انتحر حتى الشجر ..

لحظة غيابك طولت كل السفن ضايعه وجزر يتوه ف مد والبحر ما بيرحمش حد وأنت يأس من الرجوع

> غايب وحاير مرسوم ف دخان السجاير . .

كالسرابُ! ارمى السيجاره من إيديك دخن جراحك ،

واتهجى طعم المستحيلُ.. في حلم بيطارده الخرابْ يمكن الموال يعودْ

لحن الجدود

يمكن تهد في سكة الحلم السدود تطلق من القيد المدى.. تلغى الحدود كل الخطوط الحمرا.. لازم يوم تدوب واتحدى غدر البحر.. راح يخدك ف حضنه . كل الخطوط الحمرا مالحه.. بس الخنوع طعمه مرارْ كل القصايد تنبلت كل الحروف اتكعبلت ما فیش کلام راح نسکبه.. ف حلم ميت ! صح الكلام..

صُحى الجراح اوعاك تخلّي..

الصوت ينامٌ اصرخ ونادي..

مهما تلتهم الصحارى..

صوت نداك

لو باعوك اللي هنا.. واللي هناك

إياك في يوم تيأس..

وتخضع للمحال إياك تقول:

ما سمعش عنى البحر يا صدف الرمال

واعرف بأنه..

مستقيل م الموج من أحضان الجبال مربوط في سقف الدنيا مشدود للسراب والليل حبال.

التوت

فى رعشة الإيد اللى بتقيد الشموس فى الضل خوف القناديل اشتعل وإنت انطفى فيك السحاب وعروق خلايا جنتك سكنت فراغ الخوف.. عذاب! والباب.. ما هوش مفتوح لريحك والمد ويا الجزر تاهوا.. فى بحور نزف اللى فات واللى فات..

خربشات الواد ف حصن البنت، والشمس انطفت والسكه رعشه.. فوق شفايف التوت

والناس ما هيش لابسه الساعات والوقت تايه في عيون ما لهاش وطن

وانت الوحيد..

اللي طلعت الشجره من بين الولاد

> الشمس.. باركت جرأتك

بارت جران والتوته . . اداتك كتير

دلوقت...

روحك عجزت
والذكريات اللي على التوته
اتمحت
ما عدتش تطرح..
ما عدتش تفرح،
بالعيون اللي بتعشق طرحها
بصيت لصورتك في عيون بكره
فشفًاك الخجل،
والخبن اشتهاك
والجن اشتهاك
والحلم خانك..
والحلم خانك..
واستخبيت ف السكوت

والبنت قرفت لما أحضانك ريحتها اتلونت بالخوف لما أحضانك ريحتها اتلونت بالموت!

لحد ما تتغسل!

طيور بتشرب من ماغون الشمس

خاسس أكيد ؟!

واللا الزعازيع اللي محصوصه وماشيه في الشوارع.. تشبهك؟! مغرور صحيح؟

واللا الطيور اللي بتشرب من ماعون الشمس أغراتك

بإنك . . ترمى نفسك من على جبال الأماني . . بدون جناح ؟! بتحب و اللا . .

نظرة البنت استباحت. . قلبك الأهبل

وعقلك الصبي. .

فلبست من جهلك ثياب إبليس وخلعت من جوفك ضمير النبي

صحيح غبي

والدنيا ما بتديش عبيط

إيش عرفك ياد في الحياه وانت بتمشى في سكه مسقيه ضباب جواك عمار . . جواك خضار جو اك خراب! وانت. ، لإمتى تحارب الخفافيش بطوب مغموس بدم مغموس بكا مغموس ندم اطرد جراحك بالعزيمه ينفرد حلمك إراده وازرع أحضانك ف حضن البنت جامد وخلِّي قلبها . . يشرب من الدم اللي سابح في وريدك هي اللي لو خست إرادتك..

والنور ما هوش لعيون جبانه

جوه منك رح تزيدك.

هواجس

(۱) لحظة خوف . . مولوده ف لحظة موت، وعنكبوت . . فارد خيوطه ع المدى سنانير مليانه أحلام ميته . . وانت جعان أحلام والكل بيلومك . . قال إيه عشان انصدت بسهوله!

ربيع موءود. . وصيف أرعن خريف غضبان . . شتا ألعن

(Y)

وهى دى فصول السنه الجايه بذمتك . . الموت ماهوش أضمن!

(٣)

خليك هواجس . . وانفرد جواك براح واسكن الخوف يسكنك واسكن الخوف قبل ما الخوف يسكنك واياك تفكر إن بكره فارد لك جناحه يحضنك واياك تصدق نفسك المطمنه . . لا تروح بلاش ولا حد منك ينصفك ا

تنهد حيطان قلبي

(۱)

الأني..
الأني..
الما عدتش أشوف العصافير..
العني
الما عدتش أحبك..
التشفت
التشفت
الباني..
الباني..
الباني..
الباني..

(٢)

محروم

من ضي القنديل..

المزروع..

في الركن الضلمه

في وسط العتمة..

المدوده فوق جسر الخوف..

لحدود ما أشوف..

الليل جواكي..

بينصب خيمه ويسكن،

فيزلزل أركانك..

تترج الأورده جواكي تنهد حيطان قلبي! (٣)

واسالى البحر اللى . . دغدغنى بهمومه دغدغنى بهمومه واسألى الشط اللى . . غاص بيا ف سابع أرض واسألى نفسك . . . بنسج الريح فساتين للشجر اللى . . . حاجز بين جنون خيالى وبين طوفان الواقع اللى . . . غرقان ف الضجر !

ما ليش ف البعد خيرة

حد يقولي آه

قيدوني..
وكمموني
وارموا جتتي..
من فوق ثلال الغربه
تنكتب ليا النجاه
"الكونت دى مونت كريستو"
وارجع..
للبنت اللي محفوره في ضلوعي
أدوبها.. في بوسه طويله
واحتفظ بيها في شراييني

وضيعوا منى الطويق وارمونى فى بحر الرمال.. يكن أعود بنوق مملكه النعمان ما طبطبوش عليه ما حدش يواسينى أو كل شىء نصيب أو إنى أرضى بالنهايه ولو تعيسه انا أقدر أغير النهايه اقدر أكتب نهايات معيده بس جربونى بس جربونى كممونى وقيدونى

اسرقوا حلمي

یمکن أنجح یمکن أ آه...... واضح إن مافیش فایده حد یطبطب علی حد یواسینی حد یقولی ما علش حد یقولی آه آه.

صرخه

لاهاكون مرشوش فوق تصاوير الخلق رذاذ من ضى ولا عمرى هاكون ضلمه لاهاكون مرسم جوه القناديل دخان مرسوم فى الهاله ولا عمرى هاكون دخان مطلوق من قيده ولا عمرى هاكون دخان مطلوق

دمعه

شریانی انسد اتصد اترد اتخص فلاقتنی بادوخ واترمی ع الأرض ویا وشوش عریانه ویا وشوش عریانه بصیتی علیًا من غیر ما تمدی إیدیکی لبکره بصیت لك

ضحكه

قریت مره..
بإن الضحك بیطول سنین العمر
حاولت اضحك
فتحت الفم مارضاشی
کسر حلفانی واستعصی
عملت المستحیل ویاه
زادت تکشیرتی فوق وشی
کمان أکتر
جابولی مرایه أشرف نفسی
وأنا مکشر
فعدت أضحك

أساسيات جدول الطرح

(۱)

باطرح..

فكره جديده

عنيده

زى عينيه

زى النور المزروع ف القلب الصافى

كل ما بابعد عنه بفكر هعمل ايه

لو مره عينيا جت ف عينيه

رح أسلم ليه ؟

واللارح ارجع أطرح فكره جديده زى عنيه.

باطرح.. شبكى ف بحر الشوق ما هو أنا صياد ونزلت اصطاد آخر جنيه مسحوره وصادتنى الموجه المغروره وعيون الجنيه بتسأل فين الصياد؟ وانا طبعا كنت كما المعتاد.. باصطاد.. (٣)

باطرح فی عیونك وردة حب لو أدبل تروینی بدمعك لو لازم هتضحی عشانی یبقی بدمعك واللا اقولك هاتی الورده هازرعها ف صخرة أحزانی یرویها البحر . . یمكن تطرح ما هو یامه ورود یا حبیتی بتطرح جوه الصخر! (٤)

کل الأحزان وراضهری
وبابص لبکره الفارد جناحاته لبعید
والعید
اکید رح ییجی ف یوم
انا شایفه بیضحك ف عنیها
ویاریت یضحك علی طول
طول عمری
وانا هاطرح كل الأحزان ورا ضهری.

باطرح

(0)

باطرح.. من عصر الحزن الصبر والناتج.. صفر!

عمال باطرح واطرح .. وأطرح وما عادش ف قلبى خلاص مطرح لو كنت جمعت الشوك كله وزرعته ف قلبى المتجرح كان أهون إنى أعيش عمرى أطرح ما افرح وما عدش ف قلبى خلاص مطرح!

(1)

وصية ثانية

ما تهزيهوش..
م النوم لا يصحا
سيبيه
يترجم زحمة الكوابيس..
عشان..
كل المدن
يشيل همومها...
ع الحصان

وصية أخيرة

یا ضحکة الشاب الحزین یا بوسه بتسرسب ف روحه الحلم . . نور ضمّیه لصدرك خلّیه یصب ف دنیتك همه و كونى لیه فی لحظة الطیران

ميلاد

ابن وأم

كل العيال جم يلعبوا وسابوك لوجدك.. لأ.. سيبتهم.. صعبان عليك نفسك.. صعبانين عليك نفسك.. كل العيال.. ما يعرفوش قيمتك تمسح بايديها النوتو دمعك..

لساك وحيد؟

عشان تنام على حجرها وتلعبوا مع بعض

تصطفيك

ابن وأم.

حزن

مدرسه

بيشخبط الأستاذ..
على الكراريس غلط..
ويرن جرس الفسحه
تنطلق العيال..
يشوفوك لوحدك
عمال بتفتح ف الشنط..
وتصحح الكراريس

رؤيا

من دوامات النور..
عيونه استسلمت
للمشهد المزروع ف روحه م الأزل..
طريق طويل
مشقوق لقلبه
تمشى المواكب فيه
وعروسه
يرموها ف نهر الدم
عينه تودعها..
بدمعه ميته
وتترفع كل البيارق للسما!

محاولة أولى للطيران

جه الآوان..
تطلق ف وش النوه ريشك
تنام ف حضن الريح
وتغنى لحنك للعصافير الغريبه
تطير..
ترطع ف الفضا
وتاخدك..
تنسى الأرض لحظه
تفتكر..
تبس تحتك..
تبس تحتك..
تلقى نفسك فجأه..

غنوة للنكسه

ليه يا فضا لم تسعنى..
وتساع طيور ما لهاش جناح ولا ريش
أستصرخك.. ما عدت سامعنى..
تكسر جناحى اليتيم..
وتسيبنى ما تداونيش
ليه بس تتحالف..
مع الغربان على موتى؟
ما عدت بتهمنى والموت ما بيهزنيش..
بكره أضمد جراحى يا فضا وحاطير
مهما تريد موتى بالرغم منك..
هاعيش!

شك

```
كل اللى معايا . .
كانوا ضدى
كانوا ضدى
اللى باطبب فيه . .
قصده يهدنى
والشمس . .
بتسلط أشعتها على جراحى الغويطه ،
والليل . .
يجيب البرد والخوف والهموم ،
والناس . .
بتضحك من جراحى
```

معقوله..

يهزمنى ببكاه وأنا ؟ معقوله أشك ف روحى . - لأ . . - طب لأ ليه ؟ ! أنا اللى أغرتنى . . بطلوع الجو بدرى

أبرطع ف الفضا من غير حذر

أنا اللي خلتني..

أنا خنتني!

قصده يسرسب للضلوع الحزن

محاولة للنهوض

يفرع غنا في الكون أيوه اترعب يا ليل..

> جايلك.. أمزع سترتك

وأخرس طبلك الأجوف...

أتمد فوق كل الجسور علشان يعدى الحلم

وأغرق في البحور غيبتي

وأفوق..

واضرب عصاتي . . في الطريق

الأرض تبقى لى سما والزلط والطوب نجوم

أنا ضلى

اوعى تنخدع. .

شيل القناع تلاقيني..

راکب ضلمتی

راتب طبعتى باركض تجاه النور.

لحن هامشي

```
بيع يا عم..
               تستصعبك..
     كل الحسابات العقيمه..
                   وتساوي
   ف المالا نهايه.. شيء كبير
                    انتفض
 تتمد جواك الفصول الأربعه . .
        كل الشوارع فاضيه..
                م اللمعان..
               طافيه العيون
              والنهر جف..
           تنزل صبايا الحور
عشان تملا البلاليص العتيقه..
         تفيض دموع النهر..
```

تبلعهم.. تستنىع الجسر اللي شاخ

> تطلع صبيه تحضنك

راسك تتوه في صدرها..

تتوه كمان

تغطس معاها

أنهار من العسل المفى تصطفيك

إوعاك تبص لتحت تاني

بيع يا عم أجراس تدق ع الطريق

أجراس تدق ع الطريق وأدان

> يبارك حبكم . . جاي من بعيد . .

أسطوره

محاوله تانيه للطيران

من غير نصوص
لازم تمثل انت
دور البطل..
ع الحقيقه..
تستلهم الأساطير .. ترتجل دورك
يتقمص الجمهور بطولتك
يعملك رمزه..
يعينك ع الفضا

دمبينزف فراغ

الزحمة

ما رضاش يفسر زحمة الكومبارس وزع مجاميعه ع المشهد . . وف الخلفيه قبل ما يلقط الصوره نسى يحط موسيقى تسخر م الروايه!

مذبحة التمرهندي

وأنا أصلى أحب التمر... هندی من زمان عاشق حكايات اللصوص وباحب حواديت المغاره وانتفضع الكرسي.. زى البهلوان لما اشوف · على بابا على باب التاريخ واقف وغرقان ف الكسوف تتلخبط الكلمات ف بقه وتترعش فيها الحروف افتح.، سمك افتح . . لبن افتح قوام. .

سمك..لين

يا تمرهندي الانتظار لا الباب.. بيفتح له سراديب النجاه ولاهوً... راضى بالفرار هُجم اللصوص.. علی کل دار دارت سواقي نصبهم.. ع الشقيانين نضحت شقوق الأرض.. بالخوف والأنين وانت الحزين الحل ف ايديك.. وانت تایه من زمان عمال تدوّر . .

عن حلول للمسأله

بطل حواديت مخجله واحكى لي أحسن.. عن فصول المهزله واشرح لي مذبحة الحروف جوًا الكلام أصلك صعبت عليًا لما خاصمتك كل الحروف وصعبت أكتر . . لما دُخْتُ ف دوامات الحضره وروايح البخور وتدور.. تدور وتقع ف وسط الحضره زي السكرانين ولاحد عارف انت مين؟.. ولا حذ عارف رحت فين؟ حذفوك من الدنيا ومن كتب النضال

ولا حد شايف ضلك المصلوب ف كراريس العيال
ولا حد حاسس بالخيالات اللي عماله تسرسب جوه روحك ألف وش
وشوش تبش.. ووشوش تغش
على صدرالحياه.. ما تتمسحش
اشى "تُرك" على "احمد عرابي" وخلطبيط
وانت العبيط
ما عرفتش السر القديم
اللي حيفتح لك مغارات السكوت
واقف على باب التاريخ عمال تقول
افتح .. يا خوف
افتح .. يا خوف

كفها

مسكت إيدها...
وابتديت ...
أقرا ف حواديت الأميره شهرزاد:
خط الوجع ...
مدود على طول البلاد
والحظ ...
خطه بيتقطع لحظة محاولة الانتحار
وقالت لي بص
جوه كفوف اللهفه نار
بعيت لها
بعيت لها

جوه العيون خطوط..خطوط خط الجنون.. مفرود على المرمر، بيحكي عن مواويل السهر والاشتهاء وهناك هناك خط الميلاد طويل.. تمزع دفتين الروح بعاد خط الحياه.. ممحى عشان كان وقتها اللحظة هي العمر . . والعمر انتهى قالت لي بص كانت شرايينها.. بتزف دم

والدم غطى الصوره.. والحواديت قالت لى شايف إيه؟

قصيده للقرد الكبير

الليل طويل..
وعذاب مرار الأسئله بيشدنى لبعيد
والأرضه خانقه
حيطانها غرقانه..
ف دخان السجاير
ووش حاير..
ووش حاير..
عمال يقلب..
ويسأله عن أصل سيدنا الكبير
ويحقر..
ويحقر..
"دارون" يخش الأوضه بالديل الطويل
والشعر..

ما بيصليش أنا اصلى إيه . . ما بيحكليش طب بعد كام مليون سنه مُكن نلاقى . . القرد طالع للقمر وضوافره وقت الخربشه طيارات أباشى . .

بص لي من فوق لتحت

فرجعت ابص لنفسي..

يا عم "دارون" بص لي ..

ودبابات

وراح بعيد

ف جنون المرايه لاقيتني قرد كبير بشعر كثيف. وديل مبتور وعيون تدورع الحقيقه ما تلاقيش!

شاهد

فى مثل هذا اليوم من الزمن البعيد..
أنا كنت ساكن فى حشا أمى
والدايه بتصلى وبتسمى
ونزلت للدنيا
وصرخت كالدراويش..
مع تكبيرات العيد
وسمعت مع صوت الأدان..
صوت الحنين
شميت فى ريحة الجو..

ومسك دم الأضاحي ورنة الزغاريد سميه كما الرؤيا واتبسمي في وشه دا أول الأفراح وأكبر حبه في العناقيد

فى مثل هذا اليوم على البلاد..

كان عيد
الكهربا دخلت بلدنا
وضحكت العواميد
أنا لسه سامع
دوشه فى ودانى
دقات فى قلب الهون مع الترديد
إياك فى يوم تسمع لهم
هتشوف حاجات غيرهم
وتمشى عكسهم

فى مثل هذا اليوم من الزمن السعيد.. حسيت بصل الموت على جبينى وأمى دموعها بتجرى كالفيضان وايدين رحيمه تنش عنى الموت بمنشة الإيمان وراح الموت بعيد!

فى مثل هذا اليوم من الزمن الجديد.. قابلت ناس يامه خدوا بإيدى وونسوا خوفى سابولى بصماتهم على كفوفى أنا لسه ماشى فى سكتى حاسس بضل الموت على وشى السعيد وزى ما أنا جيت لكم فى يوم وحيد برضو هاسيبكوا أكيد فى يوم

رقصه

تسمحى بالرقصه دى؟
حلو إيقاع المطر وسيقى يعزفها الهوا..
فى سيمفونية تكتكات البرد..
وحفيف الشجر وحفيف الشجر أوساسى إنك أسه طفله رغم انك شايله هم كبير وينبش فى ابتسامات الحذر السما حدّ ...

فتحت.. محابس عشقها علشان تواسیکی وقلبك.. لسه حاسس بالخطر اسمحی لی.. برقصه واحده أزرع الحلم فی عیونك تطرحی فی عیونی ورده رجی قلبی زلزلینی

لإيقاع خطوتك

ليه تشيلي الهم وحدك اقسميه بينا يهون غمضي على صورتي عينك وامسحى كل الصور تسمحى بالرقصه دى؟ حلو إيقاع المطر موسيقى يعزفها الهوا... في سيمفونية تكتكات قلبك... وقلبي اللي انفطر.

الناس القاسيه

```
الناس القاسية...
مش شرط يكونوا
زى ما بنشوفهم في الحواديت
لا بعين واحده...
ولا حتى ضرورى يكون...
نابهم أزرق وغويط
```

الناس القاسيه عيونها قزاز بتبربق بالحب الفالصو ملامحها كاوتش وبالألوان وعندها قدره رهيبه.. على التشكيل

ما هماش شبه الدیب لکن جوا قلوبهم.. سرادیب.. عتمه.. و دوالیب ملیانه حاجات مکسوره صدقنی..

الناس القاسية..

الناس القاسيه جواهم حسره كبيره.. وإحساس بالحرمان إحساس إنك ماشى.. عطشان على قش في بحر عام / غرقان..

الناس القاسيه قبل ما تقسى على غيرها بتقسى . على روحها كمان الناس القاسيه ما بترقش لدموعك . . . لو عاشق ولهان ً علشان قلبها لما بيوجعها . . بتعصر ألمه من الكتمان ً

> الناس القاسيه ضد الجرح وضد الفرح..

علشان كده لما بيجيلها الفرح..

بيتحول لجنان

الناس القاسيه.. زى القطر

بتدوس.،

على قصبان مشاعرها علشان توصل يبقى عايزها تراعى مشاعرك

انت يا غلبان

لازم تفهم..

فلسفة الناس القاسيه! القسوه أعلى مراحل نضج الإنسانُ.

أخرس

بص ف عينها حاول دلوقتي تفهمها إنك لما لمست الورده قصدك حاجه وانك لما حضنت الورده

قرب منها

وانك.. لما بكيت ع الورده وانك..

لما اديتها الورده

قصدك حاجه

وإنك..

لما مشيت بعديها تنزف روحك أحزان بارده كل الأفكار عندها وارده بس لا يمكن يوم تتخيل إن الشخص الصافى الأوحد اللى استنت إنه يقولها:
"أيوه باحبك" .: علو الصوت ما بخلش عليها بحروفه علشان كان أخرس.

طعم الموت

تقدر توصف..
طعم الموت؟!
كان الطفل
ف بطن الأم
يحس حياته شهور
هتفوت
وكما العاده
قالوا ولاده
حس بإيد بتشده لبره
غصب عنه كان في الجنه
صرَّخ جامد
وبدأ يقلق .. يبكى ويرفس

لو تنساه الأم ساعات وأما اتمررت الحلمات جم فطموه عن آخر نهر بيوصل بينه وبين الجنه يعنى خلاص لازم يتعلم إنه يقول عطشان وجعان صرّخ لما طلع له سنان يمكن حس في أول قطمه طعم الموت لسه ومصر وعايز تعرف طعمه ازای ؟ بص عليّا خش في روحي يكن ما تشوفنيش من تاني لا ما تخافش عليًا هاشوفك اللي يموت بيعيش ويشوف أما العايش عمره ما يقدر يوصف أبدأ

ظعم الموت!

قال الشعرا: ..
إن النهر
فى قلب الصحرا
طارح تحت الميه الصافيه
غربان خضرا
رحت اختار لى . .
غراب يصاحبني
علشان لما أسافر يزعق
وسط المشهد ويعرفهم
إزاى يدفنوا جسمى اليابس

قالوا لابد تلاقی فی موتك واحد يقرا شاعر يكتب لك مرثيه فرقه تزفك وملحن يعمل لك أوبرا عالم ياخد من جثمانك بس خليه ويعمل فكره ومصور يلقط لك صوره عشان الذكرى

قالوا الشعرا: .. إن النهر فى قلب الصحرا اللى بيطرح تحت الميه غربان خضرا لازم يبلع جسمى النازف لما هييجى ميعاد فيضانه

مِکن بکره! مِکن بکره!

الحفله

أنا عايز الحفله بتاعتى..
أكثر بهجه
على قد الحزن..
اللى أنا شوفته فى عمرى
عايز بلالين..
للأطفال المحرومه من العيد
معازيم..
لابسين ألوان مجنونه
وبنات..
مش خايفه من سرسبة الوقت
عايز شيكولاته كتير
مصنوعه..
مضنعير استغلال أطفال أفريقيا فى جمع ثمارها
عايز تورته..

معجونه بالحب الدافي أنا نفسي في ورد بيرقص تانجو

عايز طراطير زمامير والسما بتمطر عطر "كريزي"

مزيكا بطعم البوسه وبوسه ما تحسش فيها بملح فراق

مش عايز حد في قلب الحفله..

بيرجف خوف ولا يبكي..

> حتى لو كان م الفرحه ولا عايز حد..

يبص علينا

ويمارس حزنه..

142

ورا الشباك لو واحد نفسه في حاجه.. يقولْ، أنا أصلي هاسيبكم.. بعد الحفله وأروح لهناك.

المحثور

- الإهــــــــــــــــــــــــــــــــــــ
- نُبُوءَةُ
– وَصيَّةٌ أُولَى 9
– مسلَّاديل ِّا
- صِراخُهُ بَيْنبشُ في الملكوتُ 3
- لُعْبِة
- المندوهة 91
- يا مسافر وحدي23
- ورا القضبان 31
– الزفة 33
- اغرج هينادى اللبلاب 35
- طعم الخط الأحمر مالح
- الشوت 45
- طيور بتشرب من ماعون الشمس 49
هـــواجس
- تنهد حیطان قلبی

- حديقولي آه 59
- صـــرخه
- دمــعه
- ضحکه
- أساسيات جدول الطرح 69
- وصية ثانية
- وصية أخيرة 77
- مُـيلاد 79
- ابـــن وأم
- حــزن
- مــــــــــــــــــــــــــــــــــــ
- رؤيــا ً
- محاولة أولى للطيران 89
- غنوة للنكسه 91
شــــُك
- محاولة للنهوض95
- لحن هـاهــشي97
– أمسطوره
- محاوله تانيه للطيران 101 - محاوله تانيه للطيران
- دم بينزف فراغ
- الرحمة

- مذبحة التمرهندي 107
- كيفهاا
- قصيده للقرد الكبير 115
- شاهـــد
~ رقسيصه
الناس القاسيه
- أخسرس 133
- طبعم الموت 137
- فكره
M1 1M

*

للنشرفي السلسلة،

پيتقدم الكاتب بنسختين من الكتاب على أن يكون مكتوباً على الكمبيوتر أو الآلة الكاتبة أو بخط واضح مقروء. ويفضل أن يرفق معه أسطوانة (C.D) أو ديسك مسجلاً عليه العمل إن أمكن.

يقدم الكاتب أو المحقق أو المترجم سيرة ذاتية مختصرة تضم
 بياناته الشخصية وأعماله الطبوعة .

* السلسلة غير ملزمة برد النسخ المقدمة إليها سواء طبع

الكتاب أم لم يطبع.

صدر مؤذراً فی ساسلة کنابــــهٔ

5- فوضى مُعلَنَةشوكت المصرى
6- كتابوت يسعل بشدة يوسف شعبان مسلم
7- بتشوف القمر أحسن منك أحمد عبد الحكم
8- وبعدها بلحظةمحمد السعودي نصر
9- القادمون من هناك محمد عبد الجواد
ol- أطـ لال الياسمين واثــل سليــم
11- أنا اليسوم وحبسدة إيمان السباعي
2ا- سيــرة الــورد سالم الشهبانى
13- الملوكعمرو الشيخ
14 مُوسم الكُبُسك أحمد إبراهيم الشريف
15- وجع الأغانيسهي زكسي
۱۵ – بنت من ورقنهی محمود
7- أخبار الأيام الأخيرةياسر المحمدى

شركة الأمل للطباعة والنشر (مورافيتلى سابقاً) ت. 23904094 - 23952496

جوایا سر خوایا سر خو

محمدالحناطي

الشاعر متلك أدواته جيدًا، فلديه لغة خاصة، ورؤية يسيطة ونافذة. فقد استطاع ان ستكر في قصائده عالمًا حميميًا من تفاصيل الحياة اليومية، عالم صاف وحزين، جُمل تداخله مشاعر الغرية والوحدة التى يحياها الإنسان المصري اللعاصر، وتتعرف فيه على أحلام الشاعر الضائعة في وطن مسلوب، وطن مستحيل، چاول الشاعر حامدًا أن يرسم ملامحة. ويفتش فيه عن الجميمية المفتقدة عن الإنسانية التي لم تعد لها وجود، عن محبوبته التي انتهكتها مشاعر الاستهلاك الدائمة في مذا العالم الملي، بالفقد والحرمان..

Bibliotheca Mexandrina

38

الثمن جنيهان

رجب الصاوى